



Inatsisartunut ilaasortaq  
Jens Napátók´  
/MAANI

### § 37 naapertorlugu apeqqummut nr. 234-mut akissut

*Tunumi inuussutissarsiornermik ineriartortitsineq* pillugu Inatsisartut suleriaasianni § 37, imm. 1 naapertorlugu apeqquteqarputit. Apeqqutit suliaqarfinit akineqartussangorlugit innersuunneqarput.

#### **Apeqqut 1. Suleqatigiissitap aalisarnikkut Kangiani periarfissat suut sammisarivai?**

**Akissut:** Suleqatigiissitaliap suliassaasa allassimaffiat maannakkut suliarineqarpoq. Suleqatigiissitaliat immikkoortotaqarfinneersut assigiinngitsunit marluupput. Aalisarnermut, Piniarnermut, Nunalerinermullu Naalakkersuisoqarfiup ilaatigut inuussutissarsiornermut ineriartortitsinermullu suliniutaasinnaasut Tunumi ineriartortitsinermut pitsanngorsaataasussat pillugit Inuussutissarsiornermut, Nukissiteqarnermut Ilisimatusarnermullu Naalakkersuisoqarfik suleqatigaa.

#### **Apeqqut 2. Suleqatigiissitap qaqugu suliani naammassisaq naatsorsuutigaa saqqummiutissallugu?**

**Akissut:** Suleqatigiissitaliaq pilersinneqarnikuuvoq ilimagineqarporlu immikkoortut arlallit suliarineqassasut – ataatsikkut angusaqarnissaq ilimagineqanngilaq. Suliassani immikkoortuni angusat pillugit ingerlaavartumik ilisimatitsissuteqartoqartassaaq taakkulu suleqatinut suliamut attuumassuteqartunut ilisimatitsissutigineqartassapput.

#### **Apeqqut 3. Suleqatigiissitaliami sulineq pilersaarutigineqartutut ingerlava?**

**Akissut:** Suleqatigiissitaliaq ataavartumik suliaqarpoq suliarli aggustip qaammataani pimoorullugu suliarineqaleqqissaq aasaanerani sulusut peqataasut sulinngiffeqareerlutik utersimaleriarpata.

#### **Ataani apeqqutit 4-miit 7-mut Inuussutissarsiornermut, Nukissiteqarnermut Ilisimatusarnermullu Naalakkersuisoqarfimmeersuupput.**

#### **Apeqqut 4. Suut suliniutit Kangiani inuussutissarsiornermik suarsaaneg nukittorsarniarlugu Naalakkersuisut aallartisarpaat?**

**Akissut:**

Kalaallit Nunaanni inuussutissarsiortunut ukiuni kingullerni atugassaritineqartut pitsanngornikuupput. Taamaalilluni siunissami ineriartortitsineq, siuariartornissaq atugarissaar-nissarlu qulakkeerniarlugit immikkoortuni arlalinni nutarterisoqarnikuuvoq. Nunanit allanit aningaasaliisussanik kajungersitsiniarluni inatsisinik nutarterineq aallartinneqarnikuuvoq. Tassani inuussutissarsiortunut tapersiisarnermik aaqqissuussinerit nutarterneqarnikuupput kiisalu avataanit aningaasaliisinaaneg annertusitineqarnikuulluni, tamanna

Ulloq: 16-07-2019  
Suliap normua: 2019 - 15833  
Akt nr.: 11118909

Postboks 269  
3900 Nuuk  
Tlf. (+299) 34 50 00  
Fax (+299) 34 63 55  
E-mail: apn@nanoq.gl  
www.naalakkersuisut.gl

aqqutigalugu inuussutissarsiortut atugassarisaat pitsanngortinniarlugit. Suliniutit taakku Tunumi inuussutissarsiutinik ineriartortitsinermut aamma iluaqutaasussat aallartinneqarnikuupput.

Inuussutissarsiutinut tapersiisarnermik aaqqissuussinerit taaneqartut Greenland Business-imit allaffissornikkut aqunneqarput, taamaalillunilu Tunumi suliffeqarfiit suliassanik ilisimasaqartunit ikiorserneqarnissamik aamma suliniutinik/sullississutinik ineriartortinnissamut taperserneqarnissamik, kalaallit nerisassaataasa tunisassiarinerisa siuarsarnissaannut inuussutissanik aamma sikumik imermillu suliniutit ineriartortinnissaannut kiisalu Tunumi takornariartitsinermi suliniutinik ineriartortitsinissamut taperserneqarnissamut qinnuteqarsinnaapput.

Avinngarusimasuni suliniutit ilassutaattut pingaartumik aallarnisaasut suliffeqarfiutaannut annikitsunik taarsigassarsisitsisarnermik aaqqissuussineq ukiuni sisamani misiliutitut 2018-imi atuutilersinneqarpoq.

Tapersiisarnermik aaqqissuussinerit atuuttut Kalaallit Nunaanni mittarfinnik sanaartornermi danskit peqataatinneqarnissaat pillugu Danmarkimi naalakkersuisut aamma Naalakkersuisut isumaqatigiissutaasa kinguneranik annertuseqqinneqarput. Isumaqatigiissutip ilaatigut kinguneraa Kalaallit Nunaanni ataatsimut aningaasaliissutinut Greenland Venture-mut aamma Vækstfonden-imut aningaasaliissutit 200 mio.kr-t immikkoortinneqarnerat. Tamassuma saniatigut suliniutit ilimanartut siuarsarnissaannut 20 mio. kr.-it immikkoortinneqarput. Uani aamma Tunumi suliffeqarfiit – Kalaallit Nunaanni suliffeqarfiit allat assigalugit – qinnuteqarsinnaapput aningaasallu ilaannik pissarsillutik.

Nunatsinni sumiiffinni tamani ukioq tamaat siuariartortitsinissaq qulakkeerniarlugu Naalakkersuisut suliniutinut aningaasanik 5,89 mio. kr.-nik immikkoortitsinikuupput, taakkulu nunaqarfinnut illoqarfinnullu isorliunerusunut atugassanngortinneqarput. Suliniutit tamarmik kommune-nit nunaqarfinniillu toqqarneqarput taamaammallu sumiiffinnit aallaaveqarlutik. Aningaasat ukioq tamaat ingerlaavartumik akilerneqartassapput assersuutigalugulu attaveqaatit pitsanngorsarnissaannut, pisiortornissamut inuussutissarsiutinik siuarsaanermi sanaartukkat aamma illut sulliviit pitsanngorsarnissaannut, takornariartitsinermi suliniutit suliarinissaannut kiisalu pikkorissartitsinernut isumasioqatigiinnernullu il.il. atorneqarsinnaallutik.

Kommuneqarfik Sermersooq aningaasanit taakkuninnga 1,3 mio.kr.-nik 2018-imi pissarsivoq, taakkulu nunaqarfinni aqutsisut isumasioqatigiinnerannut, sumiiffinni aalisarnermi ilitsersuinerimut siunnersortimit ikiorneqarnermut aammalu Ittoqqortoormiini tunitsiviup naammassinissaanut atorneqarnikuupput. Tunumi sanaluttarfiup iluarsaannissaanut 2017-imi tapiisoqarnikuuvoq, aalisarnermi ilitsersorneqarnissamut siunnersortimit ikiuisoqarnikuuvoq aalisarnerlu pillugu isumasioqatigiittoqarnikuulluni. Tunumi inuussutissarsiortut taamaalillutik inuussutissarsiornermi suliniutinut taperserneqarnissamik kissaateqarunik kommune-mut saaffiginninnissamut tamatigut tikilluaqqusaapput.

Great Greenland A/S aamma Kommuneqarfik Sermersooq Ittoqqortoormiini puisit amiinik tunisisarneq pillugu isumaqatigiissuteqarnialerput. Great Greenlandip ilimagaa 1. august 2019-imi tunisisinnaalernissaq ammaassinnaassallugu.

Naalakkersuisut nukissiuuteqarnermi nukissiuutinik imermillu pilersuinerimut immikkoortumut pilersaarutip ilaatut Kalaallit Nunaanni tamani akit assigiit atuutilersippaat –

taamaaliornikkut innaallagissap erngullu akii annertuumik appartillugit assigiimmik pisussaaffeqarluni naapertuilluartumillu akinik aqqissuussisoqarluni. Tamanna nunaqarfinni illoqarfinnilu avinngarusimanerusuni inuussutissarsiutit ineriartortinneqarne-rannut taperseeqataassaaq nalilerneqarporlu tamanna aamma Tunumi sunniute-qassasoq.

Taamaalilluni Tunumi inuussutissarsiutinik ineriartortitsineq siuarsarniarlugu suliniutit arlallit aallartereernikuupput.

### **Apeqquut 5. Naalackersuisut tungaanniit suut siunissami suliniutissat pilersaarusi-orneqarpat Kangiani inuussutissarsiornikkut siursaanissaq siunertaralugu?**

#### **Akissut:**

Suliniutit apeqquummi 4-mi taaneqartut ingerlateqqinnissaasa saniatigut siunissami suliniutissanik aamma Tunumi ineriartortitsinermik pitsanngorsaatissanik suliniute-qartoqarpoq.

Takornariartitsinermi sumiiffinni takornariartitsisarnerup ineriartortinneqarnissaa siunertaralugu takornarissat sammisassaannik nutaanik pitsaasunillu pilersitsinissaq ukiuni makkunani suliniutigineqarpoq. Taamaammat nunatsinni kommune-ni tamani tikeraanut sullissiviit pilersinneqassapput. Tunu eqqarsaatigalugu Tasiilami tikeraanut sullissivissaq suliniutigineqarpoq, tassani sammisaq ilaatigut tassaalluni issittumi ilisimasassarsiornerit annertuut Tunumik misigisassarsiornermi tikiffittut pingaarnertut ersarinnerulersitsisussaq.

Takornariartitsinermi suliniut nutaajuneq tassaavoq Nunami Tamarmi Alutornartunik takoqqusaarineq. Nunap immikkoortui tamarmik immikkut takornarissanut immikkuul-larissunik pilerinartuuteqarput alutornartuuteqarlutillu, takornarissallu amerliartortillugit tikilluaqqusinermi atortorissaarutit taakkununga atasut aamma annertunerusumik pisariaqartinneqalissapput. Attaveqarnermi atortorissaartunik eqqortunik pilersitsinermi atugassaritinneqartut pisariaqartut nungusaataannngitsut qulakkeerneqassapput, tassu-ngalu ilanngunneqassallutik suliniutit takornarissat tikinnerannut atatillugu sumiiffinni innuttaasut isertitsisarnerannik pitsanngortitsisussat.

Naggasiullugu inuussutissarsiutit nutaat ineriartortinnissaat aamma suliniutigineqarput. Tasiilami inuussutissarsiutit pillugit 2018-imi isumasioqatigiissitsinermi ilaatigut sikumik imermillu avammut tuniniaasarneq siuariartortitsinermi periarfissatut taaneqarpoq. Inuussutissarsiornermut, Nukissiuuteqarnermut Ilisimatusarnermullu Naalackersuisoqar-fiup taamaalilluni erngup inuussutissarsiornermi siunissami atorluarneqarnissaa siunertaralugu De Nationale Geologiske Undersøgelser for Danmark og Grønland suleqatigalugu Kalaallit Nunaanni erngup annertussusaanik misissuineq annertoq aallartinnikuuaa.

Sikumik imermillu avammut tuniniaanermut periusissiaq 2018-imeersoq inassuteqaatinik 21-nik imaqarpoq sammiviillu pingaarnert pingasut missaaniittut atorneqarlutik. Periusissiaq maannakkut piviusunngortinneqalerpoq avammullu tuniniaanissaq siunertaralugu sikumik imermillu atuinissamut akuersissutit arlallit tunniunneqareerlutik. Periusissiap piviusunngortinneqarnera nanginniarlugu Kalaallit Nunaata kitaani sumiiffinnik tallimanik neqeroortitsineq 2019-imi ammaanneqarpoq. Sumiiffiit GEUS-imit toqqarneqarput, taakkulu toqqarneqarput imeq minguitsoq annertoorujussuaq pissarsiariuminartoq taakkunani kuummat.

Sumiiffiit taakku ataasiakkaanik ataatsimeeqateqarnikkut, saqqummersitsinerni, ataatsimeersuarnerni il.il. peqataanikkut 2019-imi ukiup affaani siullermi takoqqusaarutigineqarput. Sumiiffiit suliffeqarfinnut soqutiginnittunut takutinneqarnikuupput. Misissuineq Tunumi periarfissanik annertuunik takutitsissappat sumiiffimmi inuussutissarsiutinik ineriartortitsinerup pitsanngorsarnissaa siunertaralugu nunap immikkoortuani tassani imermik pisuussutinik takoqqusaarineq annertusineqarsinnaavoq.

**Apeqquut 6. Suut Kangiani inuussutissarsiornikkut suliniutit ataqatigiissaakkat Naalakkersuisut tungaanniit suliniutigissallugit uani qinersivimmi naammassisimavaat?**

**Akissut:**

Inuussutissarsiornermut, Nukissiuuteqarnermut Ilisimatusarnermullu Naalakkersuisoqarfik Kommuneqarfik Sermersooq suleqatigalugu Tasiilami inuussutissarsiorneq takornariartitsisarnerlu pillugit 2018-ip ingerlanerani isumasioqatigiissitsivoq. Tassani Naalakkersuisut oqartussanit inuussutissarsiortuniillu assigiinngiaartunit aallartitanik peqateqarlutik Tasiilap eqqaani ilaatigut inuussutissarsiornermi periarfissat paasiniarnissaat siunertaralugu ulluni marlunni isumasioqatigiissitsipput.

Isumasioqatigiinnermi sumiiffimmi inuussutissarsiutinik ineriartortitsineq killiffissiorneqarpoq, sumiiffimmilu inuussutissarsiortut sumiiffimmi inuussutissarsiutinik ineriartortitsinermi misilittakkaminnik paarlaasseqatiginnissamut periarfissinneqarlutik. Tamassuma saniatigut Greenland Business aallarnisaasuuneq aamma inuussutissarsiutinut tapersiisarnermik aqqissuussinerit Tunumi innuttaasut inuussutissarsiortullu qinnuteqarnissamut periarfissarisat pillugit paasissutissiivoq.

Tamassuma saniatigut tapersiisarnermut aqqissuussinernut Greenland Businessimit allaffissornermi ingerlaavartumik aqunneqartunut tunngatillugu apeqquummut 4-mut akissut innersuussutigineqarpoq.

**Apeqquut 7. Suut siunissami Kangiani inuussutissarsiornikkut suliniutissatut Naalakkersuisuniit pilersaarutigineqarpat?**

**Akissut:**

Apeqquummut 5-imut akissut innersuussutigineqarpoq.

Inussiarnersumik inuulluaqqusillunga



Jens Immanuelson

Aalisarnermut, Piniarnermut Nunalerinermullu Naalakkersuisoq